

# Èkwo-ozì K'èbo

## Pyìta

### Deru

**1** <sup>1</sup>Èkwo-ozì-a bẹ shì l'èka mbedua, bụ Sayimonu Pyìta, onye ejeru Jizosu Kéreshi ozi; bya abụkwarupho onye-ishi-ozì iya. Ndu mu ede iya anụ bụ unubẹ ndu ono shì l'apfubekoto kẹ Chileke mẹ kẹ Onye-Ndzota bụ Jizosu Kéreshi nata ekweta ophu bụ okpobe iya gẹ k'anyibedua.

<sup>2</sup>Gẹ Chileke mekwaa g'unu kabaa ya amaru; l'o mekwapho g'unu kabaa amaru Nnajiuphu anyi bụ Jizosu okpobe amaru eje. G'eze-iphe-oma mẹ ehu-guu, shì iya l'èka rwube unu èka rwube iya k'anyinyi.

#### Chileke kuru unu bya ahota unu

<sup>3</sup>Anyi maru Nnajiuphu ono marweta iya ree; mbụ onye ono, bụ iya kuru anyi g'anyi bya g'anyi l'iya gbarụ mgba l'odu-biribiri iya; waa l'iphe-oma, onoduje eme. Oo l'amama ono, anyi maru iya ono bẹ Chileke shì gude eze ike nkiya nụ anyi iphemiphe, mkpa iya duru anyi g'anyi gude noduru iya ndzụ; emekwapho umere, egoshije l'anyi akwabẹ iya ùbvù.

<sup>4</sup>Oo eze ike iya ono bẹ o gudekwapho kweshia anyi ukwe-iphe, dukota ree okpobe adudu; ukwe-iphe dakiri atụ onu iya; oo ya bụ g'unu egudekwanu k'ukwe-iphemiphe ono gbakuta azu l'emebyishi onwonye ono, ndu mgboko-a l'emebyishi onwophe; kele ephe eyedzujeru onu l'egu ejo-iphe anoduje agugbabe phe nụ; waa g'unu lẹ Chileke agbaru mgba meje umere omaa ono, oome ono. <sup>5</sup>Oo ya bụ g'unu kukebeje ehu se g'unu meje umere omaa yekwa l'ekweta unu. Iphe ozo, unu e-yekwa l'umere omaa aburu anwuta. <sup>6</sup>Iphe ozo, unu e-yekwafua l'anwuta iphe aburu esede onwonye. Iphe, unu e-yekwakwanu l'esedeje onwonye aburu ota-nshi. Iphe, a-nodukwa nụ etso ota-nshi aburu akwabẹ Chileke ùbvù. <sup>7</sup>Akwabẹ Chileke ùbvù aburu iphe, a-nodu etso iya nụ bụ ehe onwunu. Iphe ozo, unu e-yekobefua l'ehe onwunu ono aburu n-yemobu. <sup>8</sup>Unu -nodu emewaa egube umere

ono eje l'iphu bẹ unu taa bukwaru 'ogalemkpa; ophu unu abueduru ndu ta amidu mebyi; l'amama unu maru Nnajiuphu anyi, bu Jizosu Kereshi. <sup>9</sup>Ole-a; onye iphemiphe ono teke erwubedu eka; atsukwa ishi; mbu l'onye ono ta ahumajedu iphe, no enya. Tem onye ono zohawaa l'oo Jizosu be sashikotaru iya iphe-aji, o shi mehawaa.

<sup>10</sup>Oo ya bu le-a; unyunna mu; o kwa unu bu ndu Chileke kuru hota unu mee unu buru unwu iya. Oo iphe ono meru g'o gude unu jee ekuke-beje ehu eme g'unu gude umere unu egoshi l'unu bupho unwu iya obu eviya; le teke unu emewaa iphemiphe ono be unu ta abyakpokwa eshiswe uzo. <sup>11</sup>Unu -nodu emewaa nno ta adukpoekwa iphe, byakpo anochi unu uzo g'unu ta abahushi l'ali-eze Jizosu Kereshi, bu Nnajiuphu anyi, bya aburu Onye-Ndzota anyi.

<sup>12</sup>Noo g'o gude mu nodu ari le mu a-nyatajekpoerupho unu iphemiphe ono. Mu makwaru-a l'unu machahawaru iya; teme l'unu pfushiwaru ike l'okpobe-opfu ono, e ziru unu ono. <sup>13</sup>O buru iya meru mu nodu ari l'o ka ree ge mu nyatakotaru unu iphemiphe ono nta-a, mu nokwadu ndzu l'ulo-ekwa k'ogwehu-a gude yeru unu oku; <sup>14</sup>eshinu mu mawaru l'o to dudu g'oo no-bekwaduru nta-a; mu alashia; noo kele Nnajiuphu, bu Jizosu Kereshi be goshiwaru mu l'o rwiwaru mu l'alala. <sup>15</sup>Mu e-kukebekpoepho ehu anyataru iya unu; k'ophu bu mu -anoedu; unu ta azohabaedu iya azoha.

### **Ndu gudekpo enya phe huma ubvu, Chileke kwaberu Kereshi**

<sup>16</sup>Le teke anyi ziru unu k'ike Jizosu Kereshi ono, bu Nnajiuphu anyi ono, bu ike, oo-gude bya ozo ono; be o to bukwa ako-iphè, nemadzū ritaru l'oriri iya be anyi koru unu. Anyibedua be gudekpoekwa enya anyi huma odu-biribiri iya. <sup>17</sup>Kele Chileke, bu Nna kwaberu iya ubvu bya emee ya o gbua nwijnwii teke ono, eguru olu-opfu ono shi l'akpabiri Ogbu-nwijnwii rwua ya nchi su: "Onye owa-a bu Nwa mu nwoke, mu yeru obu; o jiru mu epho." <sup>18</sup>Anyibedua l'onwanyi numakwaru olu-opfu ono, shi l'imigwe ono teke ono, anyi l'iya tukoru nodu l'eli ubvu, du nsò ono.

<sup>19</sup>Anyi kabaa ekweshi ike l'iphemiphe ono, ndu mpfuchiru Chileke pfuhawaru ono be bukota okpobe-opfu g'o ha. Oo-buru unu eme ree me unu -nodu angabeje iya nchi; unu du g'iphoro, no leka ochii agba jasū nchi abohu; ge kpkopode nchi-abohu ono ekeahaa paapaapa l'obu unu. <sup>20</sup>Ole ophu kachakponu, bu ophu unu e-vukpodaru uzo maru bu le-a; iphe, ndu mpfuchiru Chileke pfuru ta adukwa ophu ephe shi l'uche phe pfua g'o du phe. <sup>21</sup>Kele mpfuchiru te eshidu l'uche nemadzū. Obenu le ndu mpfuchiru, du-nsò pfuru opfu, shi Chileke lonu ge Unme-du-nsò meru gephe pfua ya.

### **Iphe, e-me ndu mpfuchiru, epfu iphe, Chileke epfuduru**

**2** <sup>1</sup>Le teke ndiche be o nwekwaru ndu mpfuchiru shi epfuje iphe, Chileke epfuduru. Nokwapho g'o duru ndu a-nodu l'echilabo unu ezi

iphe, Chileke epfuduru. Eṗhe a-jikachakwa jika Nnajiuphu anyi, bụ Jizọ-su; mbụ onye ono, bụ iya gbafutaru pḥe l'eka iphe-eji ono, eṗhe shi eme ono. Oo iphe ono meru g'o gude iphe-eji, eṗhe meshiru tukuru pḥe l'ishi. O buri iya e-me eṗhe alaa l'iyi egwegwa. <sup>2</sup> Ikpoto nemadzu e-mechakwa tsoahaa pḥe; meahaa ejo ememe. Ooburu iphe, eṗhe a-noḍu emegbabe be ndu ta abudu ndu ke Chileke ee-gude wata epfubyishi okpobe-opfu ono, bụ iya bụ uto ke Chileke ono, anyi etso ono. <sup>3</sup> Ndu ono, anoduje ezi unu iphe, abudu okpobe-opfu ono bukwapho ekpiri okpoga be eshitaje pḥe iphu. Eṗhe -gbeshi; eṗhe atuko uka, no le mgboko dzushia wushiru unu. Eṗhe egude nno gḥopyabe unu l'ugho; ria unu okpobe okpoga. Oḗ o to dukwanu g'oo-no-beru nta-a; Chileke anmaa egube ndu ono ikpe. Noo ke Chileke pfuhawaru iya ro teke ndiche dobe edobe. Mbụ l'iphe ono, bụ iya e-gbu ndu pḥe ono te ekujekwa mgbenya.

<sup>4</sup> Le-a; o -buru le Chileke ta ahaduru unwu-ojozi-imigwe, meru iphe-eji g'eṗhe ria ya ke mmanu; o tua pḥe mkporo chiru ye l'oku-alī-maa; le tsukiribaa eka agba ochii g'eṗhe nodu ngaberu mboku ikpe onoya; <sup>5</sup> o -buru le Chileke ta ahaduru ndiphe ono, meru iphe-eji teke ndiche ono ke mmanu; obenu l'o gude utso bya atuko unwu-eliphe ono rigbushia; ndu o dzotaruru buerupho Nuwa, bụ onye ezi pḥe k'apfubekoto waa umadzu esaa ozo kpoloko; <sup>6</sup> o -buru l'o nmaru Sodomu yee Gomora ikpe gude oku tsufukota pḥe eṗhe buru ntu; eṗhe chihu le mgboko l'ophu; shi nno mee ge ndu ta akwabedu Chileke ubvu maru egube iphe, ya e-me pḥe; <sup>7</sup> teme o buerupho Lotu, bụ onye pfuberekoto be o dzoru l'eka ono, ndu eme ejo-ememe bu ono. Nno l'o shi abujeru; ndu ali ono -nodu eme ejo umere, rehuru erehu ono; l'odu Lotu eji shii; bya atsukwa iya pho l'ehu atsushi iya ya ike. <sup>8</sup> Mbụ-a; o to dudu mboku-mboku, nwoke ono pfuberekoto ono te eshidu aphurwushije enya; anurwushi nchi l'ejo-ememe, ndu iphe-eji ono shi anoduje eme; k'ophu bụ l'ejo-ememe, oogudeje enya huma me ophu onu le nchi shi anoduje agbawashi iya obu.

<sup>9</sup> Oniya bụ l'o -buru l'o noo g'o du bụ ono; oo ya bụ le Nnajiuphu maru-a g'oo-me dzoo ndu kweru nkiya; maru g'oo-me yeru pḥe eka g'eṗhe nahu iphe-ehuka, byapfutaru pḥe nu; bya amakarupho g'oo-shi tuchia ndu iphe-eji l'eka eṗhe a-noḍu; l'o nua pḥe aphu k'iphe-eji, eṗhe meru; o buru eka ono be eṗhe a-noḍu jeye mboku ikpe. <sup>10</sup> Mbụ-a; ndu oo-kachakpoo njo bụ ndu ejo-iphe ono; mbụ ndu ono, buepho iphe, eṗhe anodujeepho achọ bụ g'eṗhe mee iphe, bukpuo iphe, egu iya enwu pḥe phuruphuru l'ehu; mbụ iphe, bụ eṗhe -mee ya; eṗhe emerwushia onwophe; ndu adudu onye eṗhe anuru opfu; mbụ ndu ono, ezi iphe, abudu okpobe-opfu ono; ndu bụ 'anu-le-nchi; ndu anoduje eku onwophe ekuku; ndu ata atsujedu ebvu epfubyishi ndu ono, a ta ahumajedu l'enya l'ogbu-nwiiinwii imigwe ono. <sup>11</sup> L'unwu-ojozi-imigwe be kakwa ndu ono ike okpobe akaka bya akakwa pḥe pho enweru unme; oḗ eṗhe te ejejekwa anodu l'iphu Chileke

epfurwushi phe sù l'ephe meru eji. <sup>12</sup>Obenu le ndu owa-a; bu iphe, edoduru phe enya be ephe anoduje epfubyishi. Ephe du g'anu-egbudu, enwedu egomunggo, bu iphe, a nwudoru phe bu g'a nmataje phe l'onya gba; o buru g'e meru anu-egbudu bu g'ee-me phe; ephe alaa l'iyi. <sup>13</sup>Oo iphe ono a-buru urwu, ephe e-rita l'ejo-iphe ono, ephe yeru aka ememe ono. Je akpachakpo lechilabo eswe be ephe anodujeela-a eme g'ephe ria iphe ono, egu iya enwu phe phuruphuru l'ehu ono; ephe -nodu eme iya ehú atsole phe-a utso. Ono bu iphe, iphere bya aburu iphe, uta me unu -nodu ahaje phe g'unu l'ephe tuko eri nri; me unu dokobe eri nri.

<sup>14</sup>Lenaa l'obujeru; enya phe -humawaa nwanji; l'ogue phe pho g'a su l'ephe le nwanji ono kwaru. Ophu o dudu teke egu eme ejo-iphe agubuhuje phe agu-buhu. Ntanta-a ephe edetawa ndu ophu anoshiduru ike l'iphe, ephe kwetarú; ephe anma l'onya phe. Iphe, doru phe enya buepho g'ephe e-shi kpa okpoga. Ono be ephe metawaru jeye o ria phe ishi; ephe buru ndu a tuwaru onu! <sup>15</sup>Ephe paru okpobe uzo ono, pfuru nhamunha ono haa eje phururugbaada; bya eetsowaa aka Belamu, bu nwa Bosoru; mbu onye ono bu iphe, o yeru enya bu okpoga, ookpa l'uzo apfuduru oto ono. <sup>16</sup>A baaru iya mba ejo-ememe ono; k'ophu bu le nkafu-igara, ete pfujedu opfu saru onu pfua opfu ge nemadzú gude kposhia onye mpfuchiru ono eme umere onye obvu.

<sup>17</sup>Ndu ono, ezi iphe, abudu eviya ono bu 'ogalemkpa. Ephe du g'obvu, mini tahuru. Ephe du g'igwe -rwuchaaru erwurwu k'edze mini; pherephere zikaa ya. Chileke nmawaru phe ikpe. Eka akwakoberu phe be gbahuru tsukiribaa. <sup>18</sup>Ephe anodujeepho epfu g'o bu phe kachaa amama; temanu opfu obu abukwarupho mkpokoro opfu. Ephe nodu egudeje iphe ono, egu iya enwu phe phuruphuru l'ehu ono gba be onya nmata ndu buwokwadua be ephe nahuru ndu eshiswe uzo. <sup>19</sup>Ephe ekweje phe ukwe enweru onwonye; ole ephebedua l'onwophe te enwekwanu onwophe. Ephebedua bu ohu umere, rehuru erehu ono, ephe anoduje eme ono. Noo kele oo iphe, ka amadu ike; lwu-kpee ya be amadu bu ohu iya.

<sup>20</sup>Mbu le ndu ono nwekwaru-a teke ephe shi maru Nnajiuphu anyi, bu Jizosu Kereshi okpobe amaru; mbu Onye-Ndzota anyi ono. Su ophu ephe eshiedu eshi ejo uzo ono, emerwuje unwu-eliphe ono. A nonyaepho; ejo umere ono, ephe shi hawaa ememe ono lwa azu bya eria phe ishi ozo; ka phe ike lwu-kpee phe. O kwa iya bu l'onodu ehú onye ono abya aka njo; eme le g'o duhawaa le mbu. <sup>21</sup>Mbu-a; o gogo kakwaru egube onye ono ree; ome o to dukpoda teke o majeru uzo bu o -shia ya; Chileke agua ya l'onye pfuberekoto; eme l'onye ono machaaru uzo ke Chileke bya atsu-phu azu haa emeje ekemu ono, Chileke turu iya ono. <sup>22</sup>O kwa iya bu l'iphe ono, aanmaje letu ono a-vua l'ehu onye ono, bu iya bu etu, a nmaru, suru le "Nkuta nwachaa ru enwa laphu azu je erichaa ya." Etu ozo buru le "Ezi be a wuchaa ru ehú; o laphu azu je ebvua epuchi." Noo ge ndu ono du bu onoya.

### Nnajiuphu a-bya ozo

**3** <sup>1</sup>Ndu mu yeru obu; owa kweakwa akpo ekwo-ozī ebolechiko, mu dewaru unu. L'ime ekwo-ozī labo ono be mu dewaru gude yeru unu oku; nyataru unu g'unu riye oriri iphemiphe ono, e ziru unu ono. <sup>2</sup>Oo ya bu; unu nyatajekwa opfu, ndu mpfuchiru Chileke ono pfuru teke ndiche. Ndu ono bu ndu eeyeru ubvu. Unu anyatajekwapho iphe ono, Nnajiuphu, bu Onye-Ndzota ono shi leka ndu-ishi-ozī iya zia unu. <sup>3</sup>Iphe, e-vukpoadaru uzo doo unu enya bu owa kpada; mgboko-a bya l'abvu be o nwekwaru ndu e-mechaa buru ndu taa dujedu ike sede onwophe legu ejo-iphe, enwu phe phuruphuru lehu; bukwarupho ndu a-nduje aja unu ewenu. <sup>4</sup>Iphe, epe e-pfuje bu; “?Denuhunu Jizosu obu, kweru unu ukwe le ya a-bya ozo obu? Kele e -shi teke nna anyi oche phe noru laa be iphemiphe dukwapho go du; e -shi teke e meru mgboko.” <sup>5</sup>Epe elekebekpopho enya; jika jinyia enya lephe taa ridu oriri iphe ono, Chileke meru teke ndiche ono. Loo opfu, Chileke pfuru lonu kpoloko be o gude mee igwe mee ali. Ali shi le mini du; o buru mini ono meru iphe ndzu du le mgboko. <sup>6</sup>Teme le Chileke meru igwe dzee mini; rigbukota iphe, shi du le mgboko ophu shi du teke ono l'ophu; o buru ola-l'iswi. <sup>7</sup>Igwe yele ali, bu ophu du nta-a bukwa opfu onu be e gude sede iya go nodu jeye mboku, oku e-kepyashi iya, bu iya bu mboku oke ikpe ono. Noo mboku, Chileke a-nma ndu ta anuduru iya opfu ikpe; mee phe epe aburu ola-l'iswi.

<sup>8</sup>Ole-a; ndu mu yeru obu; iphe lanu unu ata zohajedu bu lenya nnajiuphu be ujiku lanu dukwa iya-a g'unu-kuru-unu apha; unu-kuru-unu apha dukwa iya pho g'ujiku lanu. <sup>9</sup>Nnajiuphu ta akpukwa ehu akpukpu eme iphe, o kweru ukwe iya, bu iya bu iphe, ndiphe anoduje ari. O kwa nshi be ootaru anyi kele o to dudu onye o du iya ga su lo laru l'iswi; o chia g'izimanu lwa onyemoneye azu.

<sup>10</sup>Mbu le mboku, Nnajiuphu a-bya be oo-byakwa g'onye-oshi byaru oshi lenyashi. Mboku ono be igwe e-deru riiriiri mihu. Iphemiphe, du l'igwe; kpokpode me onwa me enyanwu be oku e-kekota. Mgboko l'ophu mekpoo akanya, ndiphe seru dobe l'ime iya be oku e-kepyashikotakwa. <sup>11</sup>Eshinu unu mawaru l'iphemiphe-a, du le mgboko-a bukota iphe, e-kepyashihu l'oku; unu kwabekwarupho onwunu enya meje umere, gbaru unu lememe. Unu nujeru Chileke opfu; unu eworu ndzu unu go ha ye iya leka go bukotaru nkiya. <sup>12</sup>Unu chierupho enya yee l'uzo; ngaberu mboku, Chileke a-bya emebiya mgboko-a. Oo mboku ono be Chileke a-tu oku l'igwe; oke okpomoku apaa eka; k'ophu iphe, nokota iya nu a-dazehukota. <sup>13</sup>Ole-a; Chileke be kwekwaru anyi ukwe emefuta igwe ophuu yee mgboko ophuu. Ono buwaa ndu pfuberekoto lenya Chileke bu ndu e-buru iya nu kpoloko. O buru mgboko ophuu ono be anyi ele enya iya.

<sup>14</sup>Qo ya bu; ndu mu yeru obu; eshinu unu ele ɛnya iphemiphe-a; unu kukebeɛpho ɛhu dobe onwunu ɔ̀rù g'ò tọ̀ dọ̀ iphe, aa-ta unu ɔ̀ta iya l'iphu Chileke. G'unu lẹ̀ Chileke dọ̀ lẹ̀ ree. <sup>15</sup>Unu anyatajẹkwa l'iphe, meru g'ò gude Nnajiuphu nọ̀du ata nshi ono bu g'unu bya gẹ̀ ya dzọo unu. Ọ̀ kwa-phọ̀ iphe ono bẹ̀ nwanna anyi Pọ̀lu, anyi yeru obu dehaakwaruphọ̀ unu l'ẹ̀kwo-ozì, o detaru unu. Ọ̀ kwa Chileke bẹ̀ nuru iya mmamiphe, o gude dee ya. <sup>16</sup>Lẹ̀-a; iphe, bukotakpoo ẹ̀kwo-ozì, o deru g'ò ha bẹ̀ o pfukọ̀ta-kwaru opfu iphe-a, e-mechaa mee nù-a l'iphe, bukpo ẹ̀kameka, o pfuru opfu gbaa ya ọ̀kpa. Iphemiphe ono, Pọ̀lu deshikọ̀taru ono nwekwaru ndu ọ̀phu oopfujẹ̀, te ekwejedu edo ɛnya. Ọ̀ buru iphe ono meru g'ò gude ndu amadu iphe; mbu ndu apfushiduru ike l'ekwekwe, ẹ̀phe kweru kẹ̀ Chileke; nọ̀du ewojueru iya gha igharaphu, buhukwaa g'ẹ̀phe aghajẹ̀ ikpoto iphe ọ̀zo, e deru l'ẹ̀kwo-opfu Chileke. Ọ̀ buru ẹ̀gube ono bẹ̀ ẹ̀phe emeje gude ẹ̀ka pẹ̀ meta ọ̀la-l'iswi tukobe onwophẹ̀ l'ishi.

<sup>17</sup>Qo ya bu; ndu mu yeru obu; eshinu unu vuwaa ọ̀zo makọ̀taru iphemiphe-a; unu kwabẹ̀kwaru onwunu ɛnya gẹ̀ ndu ẹ̀jo-mbọ̀ku ono te eduphu unu; g'ẹ̀phe te eme unu g'unu kweta l'ọ̀ka ono, ẹ̀phe anọ̀duje adzushi ono bẹ̀ bu ọ̀kpobe-opfu; shi nno mee g'ọ̀kpa chiswafu unu g'unu lufu l'ọ̀kpobe ọ̀zo ono, unu pfuru pfushia ike ono. <sup>18</sup>Qo ya bu lẹ̀-a; g'eze-iphe-oma kẹ̀ Chileke nọ̀du aka shii l'ẹ̀hu unu; unu akakwaphọ̀ amaru Nnajiuphu anyi bya aburu Onye-Ndzọ̀ta anyi, bu Jizọ̀su Kẹ̀reshi ọ̀kpobe amaru. Ọ̀o ya kpoloko kpẹ̀ekpu bu onye aa-nọ̀du akwabẹ̀ ọ̀bvù mbọ̀ku-mbọ̀ku jasẹ̀ lẹ̀ tuutuutuu lẹ̀ mijiimii. Nokwa g'ò dọ̀.